

19 AUG 2001

MTUC-Perjanjian

KERAJAAN DIMINTA RUNDING DENGAN KESATUAN GURU MENGENAI PERJANJIAN

KUALA LUMPUR, 19 Ogos (Bernama) -- Kongres Kesatuan Sekerja Malaysia (MTUC) meminta Kementerian Pendidikan berbincang dengan semua kesatuan guru sebelum meneruskan cadangan untuk mensyaratkan guru-guru menandatangani perjanjian berkelakuan baik.

Presiden MTUC Senator Zainal Rampak berkata walaupun kerajaan berniat membaiki produktiviti, profesionalisme dan taat setia guru menerusi perjanjian itu, tetapi ia tidak akan memberi kesan positif jika golongan itu tidak dapat menerimanya.

"Jika tidak ada keredaan, jika mereka melahirkan kurang senang, tidak puas hati, kenapa perlu (mengadakan) akujanji ini...tidak akan mendatangkan satu kebaikan pun," katanya kepada Bernama di sini, hari ini.

"Saya berharap sebelum akujanji ini dilaksanakan, Kementerian Pendidikan hendaklah mengadakan perbincangan dengan seluruh kesatuan perguruan...bincang dari hati ke hati untuk mencari jalan keluar yang terbaik...tidak semestinya akujanji ini sahaja sebagai satu mekanisme untuk memperbaiki profesion perguruan," katanya mengulas cadangan itu.

Cadangan itu, yang diumumkan oleh Timbalan Menteri Pendidikan Datuk Abdul Aziz Samsuddin baru-baru ini, telah dibantah Kesatuan Perkhidmatan Perguruan Kebangsaan (NUTP).

Setiausaha Agung NUTP, Datuk N. Siva Subramaniam sebaliknya mencadangkan kerajaan memperkenalkan etika bagi profesion perguruan sebagai perjanjian antara guru dan masyarakat.

Menteri Pendidikan Tan Sri Musa Mohamed pula berkata perjanjian berkelakuan baik itu meliputi semua kakitangan awam, bukan sahaja guru dan pensyarah.

Menurutnya syarat menandatangani perjanjian itu perlu dijadikan peraturan bagi mengekalkan prestasi profesionalisme perguruan dan mengelak guru mempengaruhi pelajar dengan fahaman politik.

Zainal berkata MTUC menerima banyak aduan daripada kalangan guru dan NUTP yang sangat kecewa dengan cadangan itu.

Katanya pandangan golongan itu juga perlu diberi perhatian berat dan diambil kira memandangkan mereka banyak berjasa melahirkan pemimpin-pemimpin negara yang terulung dan disegani di peringkat dunia seperti Perdana Menteri Datuk Seri Dr Mahathir Mohamad.

Zainal juga tidak mahu masalah itu menjadi lebih besar memandangkan jumlah tenaga pengajar di negara ini hampir 250,000 orang dan ia merupakan sektor terbesar di kalangan kakitangan awam.

"Kita memerlukan mereka bukan untuk jangka pendek tetapi jangka panjang dan kita perlu memikirkan prospek jangka panjangnya," katanya.

Beliau berkata MTUC akan menulis surat kepada Musa mengenai perkara itu tidak lama lagi.

-- BERNAMA

KHY KHY NAK